

BATASUNAREN LEGEZ KANPORATZEA
EGOITZEN IXTEA BILBO

Balkoian kateatuta, ertzainen zain

Andoni Pangua LABeko kidea Basurtuko ospitalera eraman behar izan zuten anbulantzian, jasotako kolpearen ondorioz

Iñaki Uriarte | BILBO

Laurak eta laurden aldera berria bolo-bolo zebilen Bilboko Arriaga plazan zain zeuden ehunka lagun artean: «Gasteizen sartu dira!». Urduritasuna nagusi. 16:25ean Ertzaintza-ren lau furgoneta, bi auto eta ikurrik ez zeramaten beste batzuk Areatzako egoitzaren aurrean gelditu ziren, Batasuneko kideak zeuden lekutik oso gertu.

Euria gero eta sendoago zen, ertzainek lekua hartu bitartean. Bultzada eta makilakada bultzuen ostean, brigada mugikorreko ertzainak atariaren inguruan paratu ziren. Kolpe gogor bat jaso zuen Andoni Pangua LABeko sindikalistak, eta lurrean izan zen ordu laurden batez, anbulantziak ospitalera eraman arte.


Jendea Arriaga plazatik eta aldamenetik oihuka hasi zen. «Independentsia», «Jo ta ke irabazi arte!» eta «Batasuna aurrera!» ziren gehien entzundakoak.

Egoitzan hamar arduradun eta hautetsi atera ziren balkoira,

kanporatzea atzeratzeko asmoz. Hantxe zeuden Ibon Arbulu, Eusebio Lasa eta Imanol Iparragirre mahaikideak; Jon Fano eta Txema Piko batzarkideak; eta Arantza Urkaregi eta Marta Perez Bilboko zinegotziak, besteak beste. *Batasuna, Euskal Herria aurrera* zioten kartelak altxatu ahala, kateak erakusten zituzten eskumuturretan. Arnaldo Otegi eta Karmelo Landa ere bildu zitzaizkien balkoian zeudenei.

Bostak eta bost ziren Jose Ramon Etxebarria atera zutenean ataritik. Kalekoen txalo artean banaka edo talde txikitik atera ziren gainerako guztiak. Txistuak eta oihuak gogortu egin ziren, kateatuetako batzuk bultzaka askatu eta arrastaka atera zituztenean. Balkoira irteko, ertzainek beirazko atea hautsi zuten. Arnaldo Otegi eta Jone Goirizelaia izan ziren irten azkenak.

Kalean Arbuluk lanari ekiteko eskatu zien bildutakoei. *Eusko gudariak* kantatu ostean, seieta-rako amaitua zen dena.



LUIS TEJIDO - MARISOL RAMIREZ / EFE - ARGAZKI PRESS

SAMINA ETA TENTSIOA. Txomin Ziluaga HBko buruzagi ohia Bilboko egoitzatik ateratzen, ukabila altxatuta, eta Ibon Arbulu eta Karmelo Landa balkoian, ertzainak indarrez kateak moztzen ari zirenean.

Kristal hautsiak eta kateak

KRONIKA BARRUTIK. Tentsio handiko uneak izan ziren, ertzainek barruan zirenak banan-banan atera zituztenean

Maria Gonzalez | BILBO

Bazkaldu ondoren, edozein unetan Ertzaintza sar zitekeela sumatu zuten Batasunaren Bilboko egoitzan bildutakoei. Kanpoko kontzentrazioan bizitako une estuak alderdiko kide eta jarraitzaileen aurpegian islatu ziren.

Ertzainek txirrina jo, eta han bildutakoei euren lekua hartu zuten. Egoitzako atea zabaldu ez zutenez, ostikadak eta kolpeak jo zituzten ertzainek haren kontra, burrunbada ikaragarria sortuz. Azkenean Ertzaintza barrura sartu zen.

Egoitza zigilatu behar zutela iragarri zuen ate ondoko ertzainak. Norberaren borondatez, ordea, inor aterako ez zela jakinarazi zioten barruan bildutakoei. Beraz, segurtasunerako kristalezko bigarren atea puskatu zuten ertzainek, eta hondakinak barrualdera jaurti zituzten.

Jone Goirizelaia eta Arnaldo Otegi legebiltzarkideak, Arantza Zulueta abokatuarekin batera, egoitzatik aterako ez ziratekeela azaldu zuten ertzainei, Garzon epailearen autoan oinarrituta. Era berean, poliziaren jarduerari buruzko akta sinatu behar zuten, eta,

beraz, bertan egoteko eskubidea aintzatetsita zuten.

Alderdi abertzalearen jarraitzaileak egoitzaren lehen gelan jezarri ziren, eskuetan *Batasuna eta Euskal Herria, aurrera!* zioten kartelak zermatzatela.

Tentsio handiko momentuak izan ziren hogeitaz geroago lagunak banan-banan irtenarazi zituztenean.

Batasuneko zenbait kide, bestalde, balkoian kateatu ziren, euren egoitzatik ateratzeko agindua urratuz. Haien kateak banan-banan moztu eta ertzainek kalera irtenarazi zituzten, azkenean.



MARISOL RAMIREZ / ARGAZKI PRESS

GIZA HESIA EGOITZAKO ATARIAN. Batasunaren jarraitzaileek giza hesia egin zuten Batasunaren Bilboko egoitza aurrean, ixtea eragozteko.